



POWERED BY II-2

ĐAČKI LJETOPIS

JU DRUGA GIMNAZIJA SARAJEVO



Dragi čitaocē,

pišem ti u vremenu u kojem su maske i 2 metra razmaka između svake osobe obaveza. Vremenu gdje svi iščekuju povratak na ono što smo nekada zvali normalnim životom. Problemi sa socijalnim životom, mentalnim zdravljem i obrazovanjem mladih su postali svakodnevna tema na vijestima, ali se kod nas ne dešavaju velike promjene kako bi se situacija promijenila. U narednim paragrafima, ja pišem o sadašnjosti, a ti čitaš o prošlosti života oko mene. Polažem sve nade u to da otkucavaju zadnji sati ove naše nove realnosti te da slijedi kvalitetniji život s manje bolesti.

A. H.

2021. je godina, mart mjesec, ali za mene kao da je i dalje onaj mart 2020-te, te strašne godine pune virusa. Tog mjeseca vrijeme je stalo, ali dani su nastavili prolaziti, svaki nalik jedan na drugi, svaki isti. Iako se od 2019. stanje u nekim državama vratilo na ono prije pandemije, mi se u Bosni osjećamo kao da kraja ovom virusu nema.

N. H.



Četvrtak 04.03.2021 ☁️☀️

Nije ni ljeto, a bogme ni zima, ali zar je to više važno kada nam je skoro svaki dan isti. Mijenjaju se datumi, brojevi, cifre, kao neko odbrojavanje, a ni sami ne znamo ni od kojeg broja počinjemo, a ni s kojim brojem završavamo.

DŽ. Č.

Još jedan dan kada se učenici moraju priključiti na online časove, iako nemaju želju za to, još jedan dan kada ih zove ulica, ali oni moraju sjediti za stolom, bez ikoga oko sebe i pratiti profesora dok priča o tome kako se “nešto” “nekad” “nekome” desilo. Takva je realnost, sjediš sam u svojoj sobi, sa očima fiksiranim na kompjuter i praviš se da pratiš ono što radite u tom trenutku. Na ulicama više niko ne hoda ni kada je lijep dan. Džaba nama sunce u ovom hladnom svijetu gdje su maske postale realnost. Mi samo sjedimo, bespomoćni čekamo da se i mi zarazimo, strahujemo za najbliže, pa čak i za one koji nam prije i nisu bili toliko dragi. To je, čitaoče moj, naša životna rutina. Kažu da su zdravstveni sistemi na izmaku, da situacija ide od vanredne ka katastrofalnoj, a ja se pitam hoću li ikada išta osim „Covid-19“ čuti da se spominje na vijestima. Baš me zanima da li se ti, čotaoče moj, sjećaš šta je bilo na vijestima prije svega ovoga.

L. Č



Četvrtak 04. 03. 2021.

Alarm me trznuo u 10 do 6. Zašto tako rano? - pitate se. Pa zato što sam morala još nekoliko puta iščitati tekst vezan za moju prezentaciju iz biologije na temu „Povrede zglobova i kostiju“ što mislim da je s jedne strane veoma ironično jer sam ja sama 5 puta slomila talofibularni ligament u skočnom zglobu. No, da ne skrećem sa teme. To jutro je bilo veoma sunčano, pa sam odradila jednu sesiju joge kao i obično.

A. Č.

Dan je za mene započeo rano, profesorica je odlučila pitati bosanski jezik te je meni tom prilikom oduzeto nekoliko sati sna. Ako mislite da se žalim, varate se. Samo jednom se živi, nećemo valjda život provesti spavajući?! Rijetko pratim vijesti, jer mislim da se iz njih ništa osim bijesa i sikirancije ne može izvući, ali nažalost, u ovim danima vijesti više nisu samo na televizijama, nego i live u našim okruženjima. Kažu da je sve više zaraženih, kažu i da sve više ljudi umire.

N. H.



Petak 05.03.2021.

Peti je dan mjeseca marta i peti dan sedmice. Uzeh mobitel i pročitah da je NASA-in rover prvi put vozio površinom Marsa. To mi je dalo malo snage u vidu pozitivne energije da se izborim sa monotonom svakodnevnicom borbe sa korona virusom. Ne kažem da je nama omladini najteže (iako nam je oduzeta čitava godina normalnog školovanja i uživanja u srednjoškolskim danima) naprotiv, samo se suosjećam sa svim doktorima koji su na prvim linijama borbenog fronta.

A. Č.

Petak, kao najbolji radni dan, nagovještava kratki odmor koji slijedi, no traje prekratko. Poslijepodne svaki radnik, učenik, svako dijete svoje obaveze ostavi u tom trenutku i sljede a dva dana uživa u životu bez obaveza, do onog trenutka kada se sjeti, šta sve nije uradio. No nećemo žuriti toliko. Još uvijek traje petak, a moje obaveze su za mene od ovog trenutka zaboravljene.

L. Č.

Petak u koroni provodimo više u raspoloženju „daj šta daš“, ili „ne mogu ja promijeniti sudbinu“. Vjeruješ li ti, dragi moj čitaoče, u sudbinu? Moj savjet tebi je da često otvaraš svoje prozore i tako pustiš pozitivnu energiju i ovo malo sunca da uđu u tvoj dom. Lako je prepustiti se negativni. Teško je naći dobre strane u vremenu kada je pesimizam ono što preovladava. Ono na šta ljudi aludiraju je : “Vratite nam naš život! Život bez maski i sa širokim osmijehom.“ Stvarno ne tražimo mnogo.



N. H.

Subota 06.03.2021. ☀️

Vikend je. Subota je. Dan koji mi je rano započeo s obzirom da sam se osjećala produktivno i počela da se pripremam za DSD ispit kako bih bila što spremnija. Mama me svojim umilnim glasom pozvala na doručak koji smo jeli diveći se još jednom lijepom danu koji je pred nama. U pozadini smo slušali zabrinute glasove ljudi na dnevniku koji su upozoravali na stalni porast novozaraženih, nakon čega se vedri osmijeh moje mame pretvorio u zabrinuto lice ne znajući šta nas čeka sutradan.

T. B.

Počeo je s radom prvi COVID call centar u Sarajevu, a najavljeni su i nove tzv. drive-in lokacije za testiranje građana. Broj novozaraženih se danas zamalo popeo i na četverocifrenu brojku. Jedino što u zadnje vrijeme popravlja raspoloženje je sunčan dan, kao što je i današnji.

B. M.

Ljudi kažu da u životu ne bismo trebali biti pesimisti. Međutim, danas postaje sve teže posmatrati čašu napola punom. Među svima nama se svakodnevno javlja potreba da pobjegnemo u prošlost ili budućnost, duboku šumu ili obale mora, kako bismo, bar na trenutak, u sopstvenim mislima osjetili mir i spokoj.



A. H.

Nedjelja 07.03.2021.

Osim što je predviđena za učenje, nedjeljom se ništa bitno ne dešava. Odlučila sam naučiti nove lekcije iz hemije jer mi je to najdraži predmet, ako mogu reći i hobi, jer se i u slobodno vrijeme bavim raznim hemijskim eksperimentima. I pri kraju dana prihvatih poziv svoje prijateljice iz benda da odemo na kafu te da se ispričamo (jer znamo svi da su najsočnije priče iz bendova).



A. Č.

Nedjelja je zadnja iskra sedmice koja nam pruža lažnu sigurnost da je ponedjeljak još uvijek daleko. Tog dana cijeli svijet miruje. Bliži se polahko onaj trenutak kada shvatamo da imamo obaveze i da život nije jedan dugi odmor gdje ništa nije bitno.

L. Č.

Već skoro godinu dana ne možete upaliti TV, a da ne slušate kakva je epidemiološka situacija u Sarajevu i u cijeloj BiH. Ne može se nikako pobjeći od tog korona virusa, a pored toga niko ne zna koliko će ovo zapravo trajati i kad će nam se životi vratiti u normalu (ako će to uopšte ikada biti moguće poslije ovoga, jer će virus sigurno ostaviti goleme posljedice u cijelom svijetu).

N.K.



Ponedjeljak 08.03.2021.

Osmog marta se obilježava Međunarodni dan žena. Današnji dan je značajan jer se danas slave sva poslovna, politička i društvena dostignuća žena. Često ljudi misle da je to dan kada se majci, ženi ili djevojci treba kupiti buket ili neki poklon i vide važnost ovog dana samo u tome. Misle da je dovoljno postaviti sliku na Instagram ili Facebook na kojoj piše sretan Dan žena i da se tu završava njihova obaveza i ljubav prema ženskom spolu.

L. Č.

Mi kao razred smo se složili da ćemo za 8. mart kupiti našoj razrednici, Adili Salibašić, poklon kako bi nas se sa radošću sjećala svaki put kad ga ugleda. Odlučili smo se za unikatni lančić za koji smo znali da će joj se svidjeti. Potpisali smo čestitku u prilogu sa cvijećem te joj je nekolicina nas poklone odnijela u školu i tako je iznenadila. Radost, veselje i istinska sreća je preplavila lice naše drage razrednice. To je dovoljno da ispuni čovjeka.

A. Č.



Utorak 09.03.2021.

Dan baš kao i svaki drugi - dosadan bez pretjeranih promjena. Popodne je obilježeno kišom sa susnježicom dok tmurni oblaci uspavljaju građane Sarajeva. Vijest koja me dočekala nakon buđenja jeste da je BiH 11. zemlja po smrtnosti od korona virusa u svijetu. Nažalost, brojevi samo rastu, novi rekordi u Kantonu Sarajevo se nižu. Evo maloprije saznadoh da će mi termini treninga biti otkazani, kao i probe benda čiji sam član zadnja 3 mjeseca. Ako se nastavi sa ukidanjem „pozitivnih“ događaja, čovjeku neće ostati ništa drugo nego negativne vijesti i bespomoćnost.

A. Č.

Ulice su puste. Ponekad pomislim da niko i ne živi u ovom gradu. Više ne možeš da vidiš na licima ljudi nikakvu priču niti da im pročitaš osjećaje. Vidiš samo oči koje vire iznad maske kao dva siročića. Niko više ni ne promatra druge. Svi su se zatvorili svoj svijet, u svoja četiri zida. U svojoj kući kao da si stranac i ne znaš kako da se ponašaš. Ova strašna slika pravog svijeta teška je za zamisliti, a još teža za gledati.

L. Č.




Srijeda 10.03.2021. 

Nešto neobično primijetih kad sam otvorila oči. Bijele pahulje su ukrasile martovsko jutro te ga učinile koliko-toliko zanimljivijim. Iskrena da budem, nisam neki ljubitelj snijega popraćenim hladnoćom.

Više sam raspoložena za miris proljeća i ljetne dane. Udjoh na Klix (za dnevnu dozu informisanja o rasprostranjenosti korona virusa) i ugledah da je prvu vakcinu u Bosni i Hercegovini primio infektolog koji radi na COVID odjelu Opće bolnice prim.dr. Abdulah Nakaš, infektolog Ednan Drljević.

To mi je dalo makar malu nadu da će se i moji roditelji, nadam se, ubrzo vakcinisati i tako stvoriti imunitet protiv ovog virusa. Popodnevne sate sam provela čitajući jednu vrlo lijepu knjigu: „Potraga za Aljaskom“.

A. Č.



Srijeda 10.03.2021.

U Kantonu Sarajevo donesena nova odluka. Nadležni organi vlasti su opet najavili karantin od petka navečer do ranih jutarnjih sati ponedjeljka. To je vrijeme kada inače ugostiteljski objekti rade punom parom i zbog toga su se vlasnici objekata odlučili pobuniti i organizovali su proteste. Kao da se 2020. godina ponavlja. Baš je ovakva situacija bila prije tačno godinu dana, kada su se škole zatvorile i pored nje još mnoge javne ustanove.

N.K.

Stvarno se nadam da će ovoj koroni jednom doći kraj i da ćemo se konačno vratiti normalnom načinu života. Bolnice se pune, a mi se samo nadamo da nam neće doći do kolapsa cijelog zdravstvenog sistema. Jedino čemu se još možemo nadati jeste da će sutra biti bolji dan i da ćemo sve manje slušati o lošim stvarima ovog svijeta, a sve više o dobrim.

L. Č.





Učenici II2:

- **Tajra Begović**
 - **Dženana Cviko**
 - **Lamija Čaušević**
 - **Amila Čengić**
 - **Affan Dorić**
 - **Emina Hamamdžić**
 - **Nejra Hožbo**
 - **Adna Husić**
 - **Nejra Karabegović**
 - **Dino Kustura**
 - **Hanan Lizde**
 - **Anes Mašović**
 - **Berina Medošević**
 - **Nejra Mehić**
 - **Neira Muhić**
 - **Eldina Sadiković**
 - **Hanan Smailbegović**
 - **Imad Smajlović**
 - **Erdal Šaljić**
 - **Kerim Zlatarac**
- 
- 
- 
- 